

佛门早晚课诵本：【佛说阿弥陀经】

【香赞】

炉香乍爇 · 法界蒙熏 · 诸佛海会悉遥闻 · 随处结祥云 · 诚意方殷 · 诸佛现全身
南无香云盖菩萨摩訶萨（三称三拜）

【莲池赞】

莲池海会，弥陀如来，观音势至坐莲台，接引上金阶，大誓弘开，普愿离尘埃。
南无莲池海会佛菩萨（三称）

【净三业真言】

唵 · 娑嚩 · 娑嚩秫驮 · 娑嚩达摩娑嚩 · 娑嚩秫度憾

【安土地真言】

南摩三滿多 · 莫多喃 · 唵 · 度魯度魯 · 地尾梭哈

【普供养真言】

唵 · 誚誚曩 · 三婆縛 · 伐日啰斛

南无莲池海会佛菩萨（三称）

【佛说阿弥陀经】姚秦三藏法师鸠摩罗什译

如是我闻。一时佛在舍卫国，祇树给孤独园。与大比丘僧，千二百五十人俱，皆是大阿罗汉，众所知识：长老舍利弗、摩诃目犍连、摩诃迦叶、摩诃迦旃延、摩诃俱絺罗、离婆多、周利槃陀伽、难陀、阿难陀、罗侯罗、憍梵波提、宾头卢颇罗堕、迦留陀夷、摩诃劫宾那、薄拘罗、阿那楼驮，如是等诸大弟子。

并诸菩萨摩訶萨：文殊师利法王子、阿逸多菩萨、乾陀诃提菩萨、常精进菩萨，与如是等诸大菩萨。

及释提桓因等，无量诸天大众俱。

尔时，佛告长老舍利弗：‘从是西方，过十万亿佛土，有世界名曰极乐，其土有佛，号阿弥陀，今现在说法。’

‘舍利弗，彼土何故名为极乐？其国众生，无有众苦，但受诸乐，故名极乐。’

‘又舍利弗。极乐国土，七重栏楯，七重罗网，七重行树，皆是四宝周匝围绕，是故彼国名为极乐。’

‘又舍利弗。极乐国土，有七宝池，八功德水，充满其中，池底纯以金沙布地。四边阶道，金、银、琉璃、玻璃合成。上有楼阁，亦以金、银、琉璃、玻璃、砗磲、赤珠、玛瑙而严饰之。池中莲花大如车轮，青色青光、黄色黄光、赤色赤光、白色白光，微妙香洁。’

‘舍利弗。极乐国土，成就如是功德庄严。’

‘又舍利弗。彼佛国土，常作天乐。黄金为地。昼夜六时，雨天曼陀罗华。其土众生，常以清旦，各以衣祴盛众妙华，供养他方十万亿佛，即以食时，还到本国，饭食经行。’

‘舍利弗。极乐国土，成就如是功德庄严。’

复次舍利弗：‘彼国常有种种奇妙杂色之鸟：白鹤、孔雀、鹦鹉、舍利、迦陵频伽、共命之鸟。是诸众鸟，昼夜六时，出和雅音。其音演畅五根、五力、七菩提分、八圣道分，如是等法。其土众生，闻是音已，皆悉念佛、念法、念僧。’

‘舍利弗。汝勿谓此鸟，实是罪报所生，所以者何？彼佛国土，无三恶道。’

‘舍利弗。其佛国土，尚无恶道之名，何况有实。是诸众鸟，皆是阿弥陀佛，欲令法音宣流，变化所作。’

‘舍利弗。彼佛国土，微风吹动诸宝行树，及宝罗网，出微妙音，譬如百千种乐，同时俱作。闻是音者，自然皆生念佛、念法、念僧之心。’

‘舍利弗。其佛国土，成就如是功德庄严。’

‘舍利弗。于汝意云何？彼佛何故号阿弥陀？’

‘舍利弗。彼佛光明无量，照十方国，无所障碍，是故号为阿弥陀。’

‘又舍利弗。彼佛寿命，及其人民，无量无边阿僧祇劫，故名阿弥陀。’

‘舍利弗。阿弥陀佛成佛已来，于今十劫。’

‘又舍利弗。彼佛有无量无边声闻弟子，皆阿罗汉，非是算数之所能知。诸菩萨众，亦复如是。’

‘舍利弗。彼佛国土，成就如是功德庄严。’

‘又舍利弗。极乐国土，众生生者，皆是阿鞞跋致，其中多有一生补处，其数甚多，非是算数所能知之，但可以无量无边阿僧祇说。’

‘舍利弗。众生闻者，应当发愿，愿生彼国，所以者何？得与如是诸上善人俱会一处。’

‘舍利弗。不可以少善根福德因缘，得生彼国。’

‘舍利弗。若有善男子善女人，闻说阿弥陀佛，执持名号，若一日、若二日、若三日、若四日、若五日、若六日、若七日，一心不乱，其人临命终时，阿弥陀佛，与诸圣众，现在其前。是人终时，心不颠倒，即得往生阿弥陀佛极乐国土。’

‘舍利弗。我见是利，故说此言。若有众生，闻是说者，应当发愿，生彼国土。’

‘舍利弗。如我今者，赞叹阿弥陀佛，不可思议功德之利。东方亦有阿閼鞞佛、须弥相佛、大须弥佛、须弥光佛、妙音佛，如是等恒河沙数诸佛，各于其国，出广长舌相，遍覆三千大千世界，说诚实言：“汝等众生，当信是称赞不可思议功德一切诸佛所护念经。”’

‘舍利弗。南方世界，有日月灯佛、名闻光佛、大焰肩佛、须弥灯佛、无量精进佛，如是等恒河沙数诸佛，各于其国，出广长舌相，遍覆三千大千世界，说诚实言：“汝等众生，当信是称赞不可思议功德一切诸佛所护念经。”’

‘舍利弗。西方世界，有无量寿佛、无量相佛、无量幢佛、大光佛、大明佛、宝相佛、净光佛，如是等恒河沙数诸佛，各于其国，出广长舌相，遍覆三千大千世界，说诚实言：“汝等众生，当信是称赞不可思议功德一切诸佛所护念经。”’

‘舍利弗。北方世界，有焰肩佛、最胜音佛、难沮佛、日生佛、网明佛，如是等恒河沙数诸佛，各于其国，出广长舌相，遍覆三千大千世界，说诚实言：“汝等众生，当信是称赞不可思议功德一切诸佛所护念经。”’

‘舍利弗。下方世界，有师子佛、名闻佛、名光佛、达摩佛、法幢佛、持法佛，如是等恒河沙数诸佛，各于其国，出广长舌相，遍覆三千大千世界，说诚实言：“汝等众生，当信是称赞不可思议功德一切诸佛所护念经。”’

‘舍利弗。上方世界，有梵音佛、宿王佛、香上佛、香光佛、大焰肩佛、杂色宝华严身佛、娑罗树王佛、宝华德佛、见一切义佛、如须弥山佛，如是等恒河沙数诸佛，各于其国，出广长舌相，遍覆三千大千世界，说诚实言：“汝等众生，当信是称赞不可思议功德一切诸佛所护念经。”’

‘舍利弗。于汝意云何？何故名为一切诸佛所护念经？’

‘舍利弗。若有善男子、善女人，闻是经受持者，及闻诸佛名者，是诸善男子、善女人，皆为一一切诸佛之所护念，皆得不退转于阿耨多罗三藐三菩提。是故舍利弗，汝等皆当信受我语，及诸佛所说。’

‘舍利弗。若有人已发愿、今发愿、当发愿，欲生阿弥陀佛国者，是诸人等，皆得不退转于阿耨多罗三藐三菩提，于彼国土，若已生、若今生、若当生。是故舍利弗，诸善男子、善女人，若有信者，应当发愿，生彼国土。舍利弗，如我今者，称赞诸佛不可思议功德，彼诸佛等，亦称赞我不可思议功德，而作是言：“释迦牟尼佛能为甚难希有之事，能于娑婆国土，五浊恶世，劫浊、见浊、烦恼浊、众生浊、命浊中，得阿耨多罗三藐三菩提。为诸众生，说是一切世间难信之法。”’

‘舍利弗。当知我于五浊恶世，行此难事，得阿耨多罗三藐三菩提，为一切世间说此难信之法，是为甚难。’

佛说此经已，舍利弗，及诸比丘，一切世间天人阿修罗等，闻佛所说，欢喜信受，作礼而去。

佛说阿弥陀经

【拔一切业障根本得生净土陀罗尼】

南无阿弥多婆夜 • 哆他伽多夜 • 哆地夜他 • 阿弥利都婆毗 •
阿弥利哆 • 悉耽婆毗 • 阿弥唎哆 • 毗迦兰帝 • 阿弥唎哆 •
毗迦兰多 • 伽弥膩 • 伽伽那 • 枳多迦利 • 娑婆诃

【弥陀赞】

弥陀佛大愿王，慈悲喜舍难量，眉间放白毫光，度众生极乐邦。
八德池中莲九品七宝，妙树成行。
如来圣号若宣扬，接引往西方。
弥陀圣号若称扬，同愿往西方。

【赞佛偈】

阿弥陀佛身金色 • 相好光明无等伦
白毫宛转五须弥 • 紺目澄清四大海
光中化佛无数亿 • 化菩萨众亦无边
四十八愿度众生 • 九品咸令登彼岸
南无西方极乐世界大慈大悲阿弥陀佛

南无阿弥陀佛（数百千声）

南无观世音菩萨

南无大势至菩萨

南无清净大海众菩萨（各十称）

【大慈菩萨发愿偈】

十方三世佛，阿弥陀第一。九品度众生，威德无穷极。
我今大皈依，忏悔三业罪。凡有诸福善，至心用回向。
愿同念佛人，感应随时现。临终西方境，分明在目前。
见闻皆精进，同生极乐国。见佛了生死，如佛度一切。
无边烦恼断，无量法门修。誓愿度众生，总愿成佛道。
虚空有尽，我愿无穷。情与无情，同圆种智。
十方三世一切佛一切菩萨摩诃萨。
摩诃般若波罗蜜

【回向偈】

愿生西方净土中
九品莲华为父母
华开见佛悟无生
不退菩萨为伴侣

【三皈依文】

自皈依佛 • 当愿众生 • 体解大道 • 发无上心
自皈依法 • 当愿众生 • 深入经藏 • 智慧如海
自皈依僧 • 当愿众生 • 统理大众 • 一切无碍

【七佛灭罪真言】

离婆离婆帝 • 求诃求诃帝 • 陀罗尼帝 • 尼诃啰帝 •
毗黎你帝 • 摩诃伽帝 • 真陵乾帝 • 莎婆诃

【补阙真言】

南谟喝啰怛那 • 哆啰夜耶 • 佉啰佉啰 • 俱住俱住 • 摩啰摩啰 • 虎啰•吽 • 贺贺 • 苏怛拏 • 吽
• 娑抹拏 • 娑婆诃

【补阙圆满真言】

唵 • 呼嚧呼嚧 • 社曳穆契 • 娑诃

【回向偈】

愿以此功德 • 庄严佛净土
上报四重恩 • 下济三途苦
若有见闻者 • 悉发菩提心
尽此一报身 • 同生极乐国